

長樂縣志卷二十七

列傳七 方技

舊志方技列於外紀殆以小道未必可觀歟然涉筆成趣着手生春醫家畫家載在史冊而詩學字學音學以及星學地理學無不各有專書一藝苟足成名卽片長亦所必錄並蓄兼收亦考獻徵文之一助也傳方技

宋

陳珩字用行 續通志作珩 號此山兄容見列傳容以善畫龍名珩時作水

墨枯荷折葦蟲魚蟹鵲極有生意官至朝請郎 雍正通志

明

長樂縣志 卷二十七 列傳七 一 方技

張迪哲字如愚爲道士工篆隸洪武十七年授上清宮提點 雍正通志

林銘字良箴沙堤人工詩文草書善畫山水人物竹石得宋元遺意

尤精於琴自號琴樂子與王恭高棟陳亮爲友棟作琴歌贈之 同治

彭志

林眞士洪永間與高棟友善棟題其山水云楚天雲外數峰青春水

桃花滿洞庭落日樓臺明鏡裡欲停瑤瑟候湘靈 同治彭志

陳禮字彥樂青橋人洪武間以堪輿擅名凡郡邑名地多出其手天

性倜儻嘗伺海邊岸爲田海路一帶有陳禮塘現存民利賴之所

傳地理經一册爲江西毛縣佐所得蓋至今猶嘖嘖人口云 同治彭志

劉布字孟升方安里人少聰敏嗜古書法從中書陳登遊京師歸構

山房於籌巖習書二十餘年篆籀甚工為時所重

同治彭志

朱宗明先福清縣人徙居長樂善琴奕永樂二年徵至京師以疾終

賜棺衾給驛歸貧不能葬其徒馬脩撰鐸率士流為營冢壙

同治彭志

林景時嶼頭人號虛白道士善畫山水專學二米間效商高竹木林

泉有意外趣常召入京師士大夫多重之

同治彭志

周文靖與同邑林景時皆工山水文靖蒼潤精密筆力古健兼人物

花草竹石翎毛樓閣之類咸有高致宣德間徵入直仁智殿御試

枯木寒鴉第一官鴻臚寺序班子鼎亦善畫官錦衣衛鎮撫

同治彭志

張士達邑西人善畫龍虎蘆鴈用墨設色俱入神妙

同治彭志

林輔字叔弼邑東人從張士達受筆法山水蘆鴈龍虎皆臻妙品

同治

長樂縣志 卷二十七 列傳七 二 方技

彭志

高繼端號正翁龍門人棟之族善畫葡萄得陳天民體珍重於時族

人景度亦工山水

同治彭志

劉祥字瑞初號雪溪本縣醫學訓科精於醫善畫龍虎

同治彭志

林宏顯號洞陽仙山人工畫梅石筆力蒼古世稱洞陽梅

同治彭志

鄭漿字孔濟邑西人精醫學診脉能知數年後生死活人甚衆亦能

詩

同治彭志

李煥字純正號十洋子邑東人能詩善畫龍虎同時張德輔善畫魚

林泉字遵性舉永樂甲午鄉薦隱居嶼南董山之下善畫竹

同治彭志

齊憲三代習小兒醫至憲尤精妙遇痘疹未發一見即別其吉凶百

不爽一性落魄嗜酒每痘疹盛行時門外圍繞常千百人肩輿於道聚衆攘奪憲每自病之欲棄去而不能也天下諸小兒醫未有及之者比之錢乙復生道光通志

清

高揆寵字孝荷曠達自喜以字學名家同治彭志

潘敬簡三溪人歲貢生畫山水蘆鴈筆墨絕佳同治彭志

潘文國三溪人郡廩生工畫龍虎至今寶之同治彭志

陳居仁西隅人精醫學診脉能知數年前病源決數年後生死多起

死回生人以盧扁稱之同治彭志

陳嵩巖九都東倉人精星學諷吉者多造其門子孫世傳其業同治彭志

長樂縣志 卷二十七 列傳七

三

方技

鄭迪庭字宗光二十四都東皇人幼攻舉子業未就遂學醫精其藝

活人甚多同治彭志

劉則旺二劉人精於醫能探病源決人生死奇驗兼工琵琶簫管及

雕刻人物同治彭志

陳爲研字克光邑諸生精醫理製丸藥濟人全活甚衆總督劉世明

扁曰湖海風高同治彭志

陳春樹字利州邑諸生十七都陳店人寓居會城能詩賦書畫尤精

音樂總督范時崇覺羅滿保皆雅重之令畫百鳥圖洋海分域圖又從太史徐葆光册封琉球令畫琉球封域圖皆呈御覽琉球志云國中無琴但有琴譜國王遣那霸官毛光弼於從客福州陳利

州處學琴三四月習數曲並請留琴一具從之同治彭志

馬元歆字典卿號三峯羅田人寓居會城精丹青兼工水墨皆成一
家今之善畫者稱為馬典譜同治彭志

黃琰字奕宏二十四都西宅人精篆隸八分書法乾隆十六年聖駕
南巡進百壽圖并頌聖詩賜綵緞一端吳中士大夫顏其寓曰賜

綵堂同治彭志

鄭興寬字行敷號梅亭善奕為李方伯發甲所器重不就功名恬淡
自樂著有含哺吟海濱哺唱雜賦碁譜若干卷同治彭志

應時雨浙名醫也至長樂因家東隅子尚達字厚兼承父業尤精活
人甚多壽八十三無疾而終其後多以醫世其家同治彭志

長樂縣志 卷二十七 列傳七 四 方技

鄭良荷字祖葉東隅人號龍臺居士善繪事尤長水墨得白陽山人

遺法賀志圖畫均出其手同治彭志

陳振應字有覺號耕雲江田人善畫鯉鯽同治彭志

方大彪字猷宗太醫院治定之子年二十即以醫名診知人貴賤壽
夭人呼方半仙乾隆四十二年邑令王雋病篤羣醫束手大彪獨

言可治一劑而愈名重一時同治彭志

陳超金峰人字式軒號心遠邑諸生生平不甘小就精相法遍歷海
內名流倒屣能預識名公鉅卿於塵埃中百菊溪制府始以風鑑
相親繼成文字知己制粵制吳皆與俱行每多匡贊後隨菊溪巡
揚州病卒於蘇州官廨著有兩粵遊草三江遊草皆散佚今所餘

惟少時浣腸居詩文集三卷同治彭志

高世春字殷成號秋實東隅人嘉慶癸酉歲貢生行書便面楹帖人

爭寶之同治彭志

潘振聲字貞貴三溪人精醫理能探病源多起死回生求診者門如

市貧不受謝人以此多之同治彭志

游光溥字觀字號淵如藝子邑諸生善繪事人物法黃瘦瓢山水宗

洪谷子兼得李營邱筆意晚僑寓會城水玉巷破屋數椽求畫者

醫至性狷介非其人雖售以百緡不受年七十餘卒同治彭志

鄭開源字峽山下鄭人善畫人物同治彭志

陳德慧字于湯東隅人諸生善畫魚水藻游泳宛有生趣同治彭志

長樂縣志 卷二十七 列傳七 五 方技

林在田字泰潤號景竹竹田人邑諸生好金石精篆刻能於一桃核

刻數獼猴形狀畢肖凡竹頭木屑經其刻畫均堪寶玩真草篆隸

各擅家數而篆隸尤勝駸駸乎入秦漢之室矣同治彭志

陳有統號環海江田人初業儒因母老多病棄舉業潛心岐黃以醫

鳴兼耽吟咏夏秋疫作酌古方遠近濟活無算為人玉立鋒發風

雅可人薛生白流亞也晚益骯髒可以禮招不為貲動所著傷寒

論註醫學闡微及環海吟草凡若干卷沒後遺稿散佚無存同治彭志

王觀晉字茂積號挹青東隅人善寫真工設色晚年尤長於山水含

毫邈然蓋得力於倪雲林之遺法家極貧而性高雅日在龍潭禪

室與一時文人結蓮社造板橋通溪畔種竹蒔花以終歲月云同治

彭志

陳擴字有張一字仲三邑諸生精醫學中歲得異人術診脉連三晨
即能決生死於三年中有友董天煥病隔日診視知不可醫雖夜
深路遠猶潛伺於其門如是者三閱月而煥家未之知也其敦於
友誼又如此同治彭志

陳兆泰字祖偕號六符東渡人祖松父衡俱習醫泰世其業精研傷
寒金匱等書臨證洞見本源細心體驗投藥效如桴鼓道光間邑
令王履謙以恒心扁之著有證治一隅十六卷醫學時習十二卷
萬方主治八卷未梓行同治彭志

陳成烈字用鑾旒峰人國學生精於歧黃之術求醫者日盈門有一

長樂縣志

卷二十七

列傳七

六

方技

人暴病音忽瘖而眠食如故延烈診視謂其家曰無患需三十五
日瘖自開屆期音猶昔疑前言為誕復延之到家坐未幾病者忽
自床起撫其背曰先生來矣舉家欣然跪謝諸醫亦聞而嘆服同治

彭志

施傳錡字孔湘號釜卿東隅人邑庠生善畫白菜水墨濃淡正背反
側具有生趣邑令褚登在翰林日見其畫筆極加贊賞後蒞任訪
其人出紙索畫並題贊曰蔬園野趣筆墨化工幽人之致儒者之
風晚年兼畫山水花鳥亦佳同治彭志

王際會字萬風號雲石東隅人恩貢生精篆刻善八分邑令盧擇元
稱其得漢隸法延至署示以古帖字學益進晚年尤善作擘窠大

字一曰遊福州釣龍臺通海防分府司徒緒欲書肇造區夏四大字在額易數十書手皆不愜意際會一揮而就大加贊賞欸留數

日名噪一時

同治彭志

陳玉堂字不闕號闡臣鶴上人善畫山水人物

同治彭志

林觀春字我湖岱峰人以善畫名尤長山水

同治彭志

劉克光字桂巖小劉人初以經紀謀生繼習岐黃通醫書精脉理方

不背古亦不泥古所醫者百不失一成豐間時疫大作著吐瀉辨遍貼鄉村賴以全活者無數素持齋亦不佞佛每早晨必盥水焚

香端誦五經四書及先賢格言人稱爲齋佛

同治彭志

鄭人瑞字穀禎號五雲東隅人世習醫人瑞尤精其學能知病源決

長樂縣志 卷二十七 列傳七 七

方技

生死活人甚衆道光間邑令李澍澤扁其閭曰醫學世家

同治彭志

陳于熙字朝亮國學生素性孝友爲宗族鄉黨所重善卜占無不驗

人有疑事成取決焉

同治彭志

李善和大宏里人少失怙事母最謹初業儒因多病母命改習醫輒效貧不計資邑侯王運昌以學闡岐黃扁之孫永培世其業嘗醫於貧家其妻將鬻子以療夫病培覺力阻其事資以醫藥人謂其

有祖風云

同治彭志

僧悟端別字鑿塵不知其俗姓居十二都竹林禪寺充僧會司工畫竹得與可遺意不輕下筆嘗酣臥終日夜起啜清茗展紙筆一掃而成風晴雨露各極其妙蓋意在筆先所謂胸有成竹者也

同治彭志

林甘祿籠下人精堪輿術擇地有奇驗人咸以甘祿仙稱之後得癩疾未幾卒

陳學衡忠宅人善醫術郡守翁學本聘主官醫局活人甚衆翁以心存濟世旌其閭

鄭昭起東隅人精醫術製方不輕用貴重藥藥肆見其方輒擲揄之而奏效如響鄰兒某病劇羣醫束手昭起診其脉曰得母食荔枝乎其母曰誠有之投一劑愈

黃鳳來字國鏞青山下人精岐黃術遠近就診者踵相接寒夜敲門亦遽起隨燈往家人勸阻不聽曰病非危急何必昏夜求醫其急人之急如此子翼爲咸豐己未成進士人以爲積德之報

長樂縣志

卷二十七

列傳七

八

方技

柯忠湍字壽川柯百戶人少攻舉子業屢試不售遂學醫精其術施診三十餘年活人無算子炳漢克承父業

鄭貞嘉北山人號隱谷子以堪輿名每得一地作一圖秘存之按其圖以葬無不奇驗故至今購貞嘉圖者多金不吝也

林友叟小社人精岐黃術治法如神所言輒驗延診者多爭要於途探所往而就診者日以數十計其見信於人如此卒年七十餘鄭孔禧字郁夫坑田人弱冠棄舉子業學爲醫性慈祥貧家延請不計謝金有不能備藥資者且給以藥全活無算子際昇邑庠生能世父業著有臨證心得痘疹指南二書次子勳孝廉傳見義行三善竹林寺僧也醫治如神有爲刀杖所傷者雖垂危能應期愈謝

以金不計多少不謝亦不索也至今門徒猶世傳其業

黃逢超青山下人少聰慧喜讀醫書尤心得於醫宗金鑑依法製丸散治奇症極驗好導引術每庚申日必登高峰吸日氣忽一日著道家冠服趺坐而逝年四十九遠近惜之

鄭敦燾字懋功東隅人名醫人瑞子精方脉求醫者戶外屢滿光緒乙酉秋瘧疾盛行敦燾酌改古今方傳播遠近全活甚衆知縣徐承禧以醫中師範旌其閭弟敦字亦以醫名知縣王宜劼病篤敦字視之言二十日可愈屆期果然贈以扁曰醫學名家

陳迪鼎字理齋西隅人邑增生善畫墨竹精篆隸子煥亦以墨竹篆隸名人稱其有父風云

長樂縣志

卷二十七

列傳七

九

方技

鄭景文字筱蘭附貢生性篤厚嗜讀醫書尤精於婦科有婦人新產二日患吐瀉症綦危景文主生化加味一劑羣醫大譁以爲芎歸分毫不得用景文力爭服之竟獲愈衆服其神其餘瀕死而得生者亦指不勝屈

陳士青字挹丹西隅人善繪人物奕奕有生氣

陳延年字揚松古槐人精醫學時以濟世爲念壯歲游平潭所治必應手愈平潭有防營將弁伍卒病輒延請無不奇效故與彭定泰軍門黃紫標協戎爲莫逆交

傅文根傅朱村人精卜筮所言輒驗人咸以爲神

姜宜琢楓林人性穎悟精醫術時瘟疫盛行求診者日以百計杵藥

爲丸布施遠邇獲愈者多

林光志字晴嵐善畫尤工於傳神

陳賚字俊邨江田人邑庠生治岐黃術性仁厚時鼠疫盛行患者十
八九死賚曰鼠疫之症爲傷寒金匱所無遂參酌古今立一方傳
布遠邇全活甚衆著有醫學研餘六卷

陳揚祖字耀甫江田人專門幼科診痘疹奇效著有痘疹新書子明
佃世其業尤善種鼻痘

陳道作字元亮江田人善墨畫傳神如眞

陳仁詔字崇丹東隅人邑庠生性仁厚好施與精通醫術己卯秋時
疫盛行投以劑輒見效有窮孀子甫六齡霍亂垂危仁詔診之並

長樂縣志

卷二十七

列傳七

十

方技

給丹藥病尋愈著有各種醫解藏於家次子穎辛卯副貢三子諤
邑庠生